

Naqqiut

Siunnersuut 16. 05. 2018-imeersoq taarserpaa
(Makku naqqiutigineqarput Inatsisip qulequtaa saqqummiussassallu qulequtaa)

Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasagaatit pillugit Inatsisartut inatsisaat nr. xx, xx. xxx 2018-imeersoq
(Ineqarnermut Attaveqaqatigiinnermullu Naalakkersuisoq)

Saqqummiussissut

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisut sinnerlugit, Nuummi Ilulissanilu nunani tamalaani mittarfiit kiisalu Qaqortumi nunap immikkoortuani mittarfiup sananeqarnissaannut aningaasalersorneqarnissaannullu sinaakkutissatut piumasagaatit pillugit Inatsisartut inatsisissaannut nutaamut siunnersuut, matumuuna saqqummiuppara.

Inatsisissatut siunnersuut suliap ingerlanerani, mittarfiit nutaamik ilusiligaanissaat pillugu Inatsisartut aalajangiineranni aallartinneqartumi, alloriarnerup tulleraa. Nunatta oqaluttuarisaanerani attaveqarnermi aningaasaliinerit annersaat, aammalu siuariartortitsinerup tikikkuminassutsillu annertunerulersinnissaannut nutaarluinnarnik periarfissaqarneq, pisussanngorput. Mittarfinnik annertusaanermi inuiaqatigiinnut aningaasaqarnikkut sunniutaasussanik nalilersuinerup ersarissumik takutippaa, Ilulissani, Qaqortumi aamma Nuummi nutaanik mittarfittaarnermi mittarfiit ilusiligaaneranni nutaami aningaasaliinissaq, inuiaqatigiinnut iluaqutissartaqarnerpaajusoq. Mittarfiit nutaamik ilusiligaaneranni Nuummi aamma Ilulissani angisuunik marlunnik mittarfittaarnermi, maannakkut Kangerlussuarmut ilaasartut 60%-iinit amerlanerusut siunissami ornigassaminnut toqqaannartumik timmisartuunneqarsinnaanerit, qulakkeerneqassaaq. Qaqortumi mittarfittaarnermi nunap immikkoortuata iluani angallannermi pisariaqartitsinerup 50%-ia sipaarfiussaaq. Aningaasaliinerit annertuut pineqaraluartut, maannakkut mittarfiit ilusiligaanerit ingerlatiinnarneqarpat, aamma mittarfinni iluarsaassinerni aserfallatsaaliuinernilu annertuunik aningaasaliisoqartariaqartoq, eqqaamassallugu pingaaruteqarpoq, taamaattumik attaveqarnermi aaqqiissutissat arlaalluunniit toqqaraluaaraanni, siunissami angallannerup isumannaarnissaanut Nunatta karsiani aningaasassanik annertooujussuarnik nassaartariaqartussaavugut. Nutaanik mittarfittaarnermi Nunatta karsiata aamma aktiaatileqatigiiffiit Namminersorlutik Oqartussanit pigineqartut akiitsunut qularnaveeqqusiinernullu pisussaaffii tamarmiusut 2017-imi mittarfiit takissusissaat

apeqqutaatillugu 4,1 mia. koruuniniit 2022-imi 6 mia. koruunit tungaanut qaffassasut naatsorsuutigineqarpoq. Tamanna BNP-ip 41 %-ata missaannik annertussuseqarpoq, aammalu tassani oqaatigissallugu pingaaruteqarpoq, tamanna nunanut tamalaanut atatillugu appasimmat.

Siunnersuummi matumani aningaasanut inatsimmit ukioq ataasikkaartumit, inatsimmut ataavartussamut, inatsimmi tunngavissat ingerlateqqinneqarput. Tassani ilaatigut pineqarput Kalaallit Airports A/S-imi aallarniutitut akiliutinut nalinginnaasumik aamma immikkut ittumik isertitat atugassiissutigineqarnissaannut, naqissusiinermut akitsuusiinnginnissamut, nuna tamakkerlugu pilersarusiornermut, avataaniit aningaasalersuinermut, nunani tamalaani atugassarititaasut tunngavigalugit neqeroortitsinissamut aamma imaatigut assartuussinermut tunngasut.

Kalaallit Airports A/S taarsigassarsisussanngorpat, aningaasanut inatsimmi ukioq ataasikkaartumi inatsimmi tunngavissaqarnermit, inatsimmut immikkoortumut allanngortitsinissaq, pingaaruteqarpoq. Inatsisartut inatsisaat Kalaallit Airports A/S-ip suliaannut sinaakutissiivoq aammalu taarsigassarsititsisut aningaasaliinissaannut taannalu aqqutigalugu sapinngisamik pitsaanerpaanik taarsigassarsinermut atugassaqtitaanissamut pisariaqartunik qularnaarisussaalluni.

Siunnersuut ingerlatseqatigiiffiup aningaasalersuinerata tamarmiusup ilaatut, Kalaallit Airports A/S-imi nammineq aningaasaatinut tunngaviusaaq aammalu Namminersorlutik Oqartussat mittarfinnik nutaanik sanaartornermut qanittumi taamatullu ungasissumi aningaasalersuinermut peqataasinnaaneranmut ammaassilluni.

Kalaallit Airports A/S 2018-imumt Aningaasanut inatsisissap pingajussaanneerreqarnera tunngavigalugu 2017-imi pilersitsinissamut akuersisummik tunineqarpoq. Taarsigassarsititsinermi atugassarititaasut, qularnaveeqqusiinissamik piunnaasaqatit imaluunniit suliariumannittussarsiuussinerup inernerana, inatsisissatut siunnersuummi isummerfigineqanngimmata erseqqissassavara.

Naggataatigut sanaartornermut illuliortiternermullu kiisalu taakkua aningaasalersorneqarnerannut isummernissamut, Inatsisartut siunnersuummik suliarinninnerat, tamatumalu kingorna Naalakkersuisut taarsigassarsititsinermut atugassarititaasunik, qularnaveeqqusiinissaq pillugu piunnaasaqatinik aamma suliariumannittussarsiuussinerup inerneranik suliarinninnerat kiisalu Aningaasaqarnermut Akileraartarnermullu Ataatsimiititaliap qularnaveeqqusiinissamik suliarinninnera apeqqutaasussaapput.

Taamatut oqaaseqarlunga siunnersuut Inatsisartuni kajumittumik suliaassanngortippara.